

समै – 12:25 hrs.

<><><><><><>

LG-Op Mahadev

उपराज्यपाल मनोज सिन्हा होरें जम्मू-कश्मीर पुलस दे उनें जवानें गी मुबारकबाद दिती ऐ जिनें गी आपरेशन महादेव गी कामयाबी कन्ने अंजाम देने लेई केंद्री गृह मंत्री दक्षता पदक 2025 कन्ने सम्मानित कीता गेआ ऐ। आपरेशन महादेव सुरक्षाबलें ते पुलसकर्मियें दा इक सांझा अभियान हा जेदे तैहत 22 अप्रैल गी पहलगाम आतंकवादी हमले च 26 बेदोसे नागरिकें दे मारे जाने लेई जिम्मेदार 3 पाकिस्तानी आतंकवादिएं गी मारी मकाया गेआ हा। इक सोशल मीडिया पोस्ट च उपराज्यपाल होरें आखेआ जे हर इक भारती गी स्हादे जम्मू-कश्मीर पुलस कर्मियें पर गर्व ऐ। उनें उंदी दलेरी, समर्पण ते अदम्य साहस दी सराहना करदे होई आखेआ जे ओह सभनें गी प्रेरित करदे न।

<><><><><><>

CM-Kashmir-Marathon

मुख्यमंत्री ओमर अब्दुल्ला होरें अज्ज कश्मीर मैराथन दे दुए संस्करण गी झंडी दस्सियै रवाना करोआया। इस मौके उप्पर बॉलीवुड दे मशहूर कलाकार सुनील शेट्टी बी उंदे कन्ने उत्थे मजूद हे। जम्मू-कश्मीर दे सैलसफा मैहकमे आसेआ आयोजित इस पैहलकदमी दे तैहत प्रतिभागिएं लेई 42 किलोमीटर लम्मी फुल मैराथन ते 21 किलोमीटर दी हॉफ मैराथन दा सरिस्ता कीता

गेआ। 27एं राज्यें ते केन्द्र शासत प्रदेशें दे कन्नो-कन्नी 11 होरनें मुख्यें थमां आए दे प्रतिभागी बी इस द्रौड़ च हिस्सा लै करदे न। एह् गैह्, नां छड़ा खेड्डें गी सगुआं कश्मीर दी कुदरती खूबसूरती ते सैलसफा गी बढ़ावा देने च बी मदाद करग। खेड्डें सरबन्धी मैहकमे दे मंत्री सतीश शर्मा बी इस मौके पर उत्थे मजूद हे।

<><><><><><>

Darbar-Move

चार बरें शा बद दे वक्फे मगरा स्याले आहली राजधानी जम्मू च दरबार मूव आहले दफ्तर कल्लै थमां फही खुल्लने आहले न। नेशनल कांफ्रेंस सरकारै हाल च गै इस बवस्था गी बहाल कीता हा। श्रीनगर आहले सिविल सचिवालय थमां कम्म करने आहले सभनें मैहकमे हुन दरबार मूव दे तैहत स्याल आहली राजधानी जम्मू च कम्म करडन। श्रीनगर स्थित सचिवालय नै कल शनिवार गी 6 दिन कम्म करने आहले रफ्तार बंद करी दिते हे। एहदे कन्नै गै सरकार दे जम्मू थमां कम्मकाज दी शुरूआत होआ करदी ऐ जेदा मकसद घाटी दे सख्त ठंडू दे म्हीने दरान प्रशासनिक पुज्ज बनाए रखना ऐ। दरबार मूव दफ्तरें गी कल विजन कुसै दिक्कत-परेशानी दे खोलने दी बवस्था कीती जा'रदी ऐ।

<><><><><><>

Heli-Services

जम्मू खिते दे पहाड़ी ते बर्फीले जिलें ताई रियासती हेलीकाप्टर सेवां अज्जै थमां रम्भ होआ करदियां न। एहदे कन्नै इनें इलाकें दे बसनीकें गी बड़ी राहत थोग। जम्मू दे डिविजनल

कमिशनर रमेश कुमार होरें इस सरबंधे च कीती जा'रदियें तैयारियें दा कल जायजा लैता हा। एह सेवा जम्मू गी पुंछ, मेंढर, राजौरी, डोडा ते किश्तवाड़ कन्नै जोड़ग जेदे कन्नै स्याले दरान किफायती ते भरोसेमंद हवाई राबता यकीनी बनी जाग। बुकिंग ताई लोक 7006146090 या 9596996337 पर संपर्क करी सकदे न। अधिकारियें दस्सेआ जे इस सूहलत कन्नै पहाड़ी जिलें दी यात्रा सरबन्धी दिक्कतें च कमी औग ते लोकें दी जरूरी सेवां तगर पुज्ज बढोग।

<><><><><><>

DM-Tenants

आम लोकें दी सुरक्षा गी यकीनी बनाने आस्तै जिला मैजिस्ट्रेट राकेश मिन्हास होरें जम्मू दे सब्बै मकान मालकें, दकानें-हट्टियें ते बपारिक प्रतिष्ठानें दे मालकें गी निर्देश जारी करदे होई आखेआ ऐ जे ओह 7 दिनें दे अंदर-अंदर अपने करायेदारें, मदाद करने आस्तै रक्खे दे लोकें ते निजी क्षेत्र च कम्म करने आहले कर्मचारियें दा ब्यौरापेश करन। जिनें लोकें पहले गै कमरे या दकानां-हट्टियां वगैरा कराए पर दिती दियां न या मजदूर रक्खे दे न, उनेंगी इस हुक्म दी पालमा करनी होग। एहदे ताई फार्म दी शकल डी. एम जम्मू दे आधिकारिक एक्स हैंडल पर उपलब्ध ऐ ते उसी भरियै अपने दस्तखत करने परैंत मकामी पुलिस स्टेशन च जमा करोआना होग। हुक्म दी खलाफवर्जी करने आहलें खलाफ कनूनी कार्रवाई कीती जाहग। एह हुक्म 31 अक्टूबर थमां लेइयै अगले 8 हफ्तें तगर लागू रौहग।

<><><><><><>

Weather

श्रीनगर च स्थित मौसम विभाग दे केन्द्र नै जम्मू-कश्मीर च आँदे किश दिनें दरान मौसम आमतौरा पर खुश्क रौहने दी पेशनगोई कीती ऐ- जेहदे बाद अगले हफ्ते केन्द्र शासत प्रदेश दिएं किश थाहें पर बरखा ते बर्फबारी होई सकदी ऐ। उ'आं 4 ते 5 नवम्बर गी मौसम बदलोखड़ा बने दा रौहग ते उच्चियें धारें पर टामीं-टामीं थाहें हलकी बरखा ते बर्फबारी होने दे बी आसार दस्से गे न। जारी जानकारी मुजब 4 नवम्बर दी शामीं ते रातीं कोला लेइयै 5 नवम्बर दपैहरी तगर बरखा बरने दे आसार दस्से गे न। करसानें गी सलाह दिती गेई ऐ जे ओह 4 ते 5 नवम्बर गी अपने कम्में गी अगड़े पाई रक्खन तां जे उ'नेंगी मौसम सरबन्धी कोई नुकसान नेई ठोआना पवै।

<><><><><><><>

GST

जीएसटी दिएं दरें च 22 सितम्बर थमां लागू कीती गेदी कटौती दे बाद इस ब'रे अक्टूबर दे कुल सकल वस्तु ते सेवा कर यानि जीएसटी संग्रैह च अक्टूबर 2024 दे मुकाबले च 4 इशारिया 6 फीसद बाद्दा दर्ज कीता गेआ ऐ। अक्टूबर 2024 च जीएसटी थमां कुल राजस्व संग्रह इक लक्ख 87 ज्हार करोड़ रपे हा जेहड़ा हुन बधियै इक लक्ख 95 ज्हार करोड़ रपें शा मता होई गेआ ऐ। अक्टूबर च केन्द्रीय जीएसटी संग्रैह 36 ज्हार 5 सौ 47 करोड़ रपे ते राज्य जीएसटी 45 ज्हार 134 करोड़ रपे हा।

<><><><><><><>